

Allannguutissatut siunnersuut

uunga

**Uunga siunnersuut: Nappaatit tunillaassortut akiorniarlugit iliuutsit pillugit
Inatsisartut inatsisaat**

Aappasaaneerinninnermut Ilaqtariinnermut Peqqissutsimullu Ataatsimiitaliamut saqqummiunneqartoq.

Kapitali 12-imut

1. Kapitali 12 ima oqaasertaqassaaq:

”Kapitali 12

Atuutilersitsinermut atuukkunnaarsitsinermullu aalajangersakkat

§ 57. Inatsisartut inatsisaat ulloq 1. juli 2022 atuutilissaaq.

Imm. 2. Inatsisartut inatsisaat ulloq 1. juli 2023 atuukkunnaarsinneqassaaq.”

Siunnersummut nassuaatit

Nalinginnaasumik nassuaatit

Inatsisartut Siulittaasoqarfiata 2021-mi januaarimi Naalakkersuisunut kaammattuutigaa nappaatit tunillaassoortut pillugit inatsimmi inatsit malillugu killiliilluni iliuutsinik inatsisartutigoortumik nakkutilliisinnaanermut najoqququtanik nappaatit tunillaassortut pillugit inatsimmi ilanngussisoqarnissaanut suliniuteqaaqquillugit. Tamatumunnga atatillugu Siulittaasoqarfiup oqaatigaa Covid-19 eqqarsaatigalugu pissutsinut tunngatillugu aalangiisarnerit innuttaasunut suliffeqarfinnullu annertuumik akulerunnerummata, soorlu aamma aalajangiinissamut tunngaviganusut kingunerisassanullu tunngatillugu erseqqissunik paasinartunillu aalajangiisoqartarnissaata pisariaqassusia Siulittaasoqarfiup uparuaraa. Tamatuma saniatigut Siulittaasoqarfiup innersuussutigaa taamanikkut nappaatit tunillaassortut pillugit inatsisissatut siunnersuut nutaaq Danmarkimi suliarineqaleruttormat ilaatigut nappaatit tunillaassortut pillugit inatsit malillugu akulerunnerit inatsisartutigoortumik nakkutigineqarsinnaanerisa qularnaarneqarnissaat siunertaralugu.

Inatsisissatulli siunnersuut Naalakkersuisunit saqqummiunneqartoq aalajangersakkanik imaqanngilaq nappaatit tunillaassortut pillugit inatsit malillugu iliuutsinik inatsisartutigoortumik nakkutiliisinnaanissamik qularnaarinnittunik.

Tamatumunnga tunngaviusut qulaajarneqarnissaannut Naalakkersuisut Ilaqtariinnermut Peqqissutsimullu Ataatsimiitaliamut akissummi paassisutissiissutigisimavaat inatsisartutigoortumik nakkutiliisinnaanermut aalajangersakkanik Danmarkimi nappaatit tunillaassortut pillugit inatsimmi atuuttumi aalajangersakkanut naapertuuttunik ilanggussinissaq isumaqanngitsoq tamanna tamatigut pissusissamisuussasoq, tassamigooq Kalaallit Nunaanni Danmarkimilu naalakkersuinikkut aqtseriaatsit assigiinngimmata. Naalakkersuisut taamaattumik tamatuma ulluinnarni sulinermut inatsisilerinikkullu kingunerisassaasa tamakkiisumik qulaajarneqarnissaat kissaatigaat Danmarkimi inatsimmut naapertuuttumik inatsisartutigoortumik nakkutilleeriaatsimut naapertuuttumik nappaatit tunillaassortut inatsisip allangortinnejarnissaanik siunnersuuteqannginnermi.

Ilaqtariinnermut Peqqissutsimullu Ataatsimiitaliap suliniutit tamakku siumut ingerlanissaat ikorfartorniarlugu kissaatiginartissimavaa siunnersuummi saqqummiunneqartumi atorunnaarsitsinissamut piumasaqaammik aalajangersaasoqassasoq Inatsisartut inatsisaata ulloq 1. juli 2023 atuukkunnarsinneqarnissaanik malitseqartussamik.

Taamaallugu naatsorsuutigineqarpoq Naalakkersuisut nappaatit tunillaassortut akiorniarlugin iliuutsit pillugit Inatsisartut inatsissaannik nutaamik kingusinnerpaamik 2023-mi upernaakkut ataatsimiinnermut saqqummiussissasut, inatsisissatullu siunnersuut taanna aalajangersakkanik imaqassasoq Inatsisartut inatsisaat tunngavigalugu iliuusaasinnaasut – annertuumik akulerunnerusinnaasut – inatsisartutigoortumik nakkutigineqarsinnaanerinik qularnaarittumik.

Inatsisissatut siunnersuummut tunngatillugu Ilaqtariinnermut Peqqissutsimullu Ataatsimiitaliap isumaliutissiissutaa allatigut innersuussutigineqarpoq.

Allannguutissatut siunnersuummi aalajangersakkanut ataasiakkaat nassuaatit

Nr. 1-imut

Allannguutissatut siunnersuutip malitsigisaanik Inatsisartut inatsisaat ulloq 1. Juli 2023 atuukkunnaarsinneqassaaq.